





三集第一種

易林釋文



敘

漢焦延壽易林以六十四卦變而之四千九十六卦班志  
不著錄隋志五行類有焦贛易林十六卷漢書儒林傳京  
房受易梁人焦延壽云嘗從孟喜問易房以爲延壽易卽  
孟氏學東觀漢記永平五年秋京帥少雨上御雲臺召尙  
席取卦以周易卦林占之其繇曰蟻封穴戶

黃本作蟻封  
戶穴與集協

韻此依永樂大  
典引東觀漢記

大雨將集明日大雨以詔書問沛獻王輔

今易林震之蹇有此文漢世甚重其書亭林顧氏疑爲東  
漢以後人撰託非也亭林謂其時左氏未立學官易林引  
左氏語甚多又往往有漢書中事如長城旣立四夷賓服  
交和結好昭君是福事在元帝竟寧元年晏案左傳當西  
漢時雖未立博士賈誼已爲訓故河閒獻王傳其學毛詩  
故訓傳多依用之於易林何疑焉至昭君不必爲元帝時

事或取昭明之義如毛詩平王之類萃之臨曰昭君守國  
諸夏蒙德此昭君又何以解焉且元帝之世延壽固當見  
之矣漢書京房傳焦延壽字贛贛貧賤以好學得幸梁王  
王共其資用令極意學既成爲郡史察舉補小黃令贛嘗  
曰得我道以亡身者必京生也房以元帝建昭二年上封  
事棄市死時年四十一元帝紀建昭五年明年春正月改  
元竟寧賜單于待詔掖庭王檣爲閼氏匈奴傳元帝以後  
宮良家子王檣字昭君賜單于延壽生歷昭宣元之時或  
猶及見其事唐王俞序謂延壽當西漢元成之間必有所  
據亭林謂延壽在昭宣之世亦非也易林學出西京文義  
古奧非東漢諸儒所能依託流傳既久沿譌滋多舊有汲  
古閣毛子晉本漢魏叢書何允中本近有黃丕烈重校宋  
本黃本刻工完整售者爲之紙貴然曩以毛何本校之頗

有舊本不誤而黃本妄改之者則宋本亦未盡可據矣坤  
之豫曰盡我筋力胝蠶爲疾黃刻宋本誤作蠶比之大過  
云胝繭爲疾胝卽胼胝之胝蠶卽足繭之繭爲疾與上堅  
不可得合韻黃刻宋本疾字作候尤爲誤也需之兌曰牡  
飛門啓同人之夬同漢五行志京房易傳有城門牡飛事  
黃刻宋本皆誤作杜飛其誤甚矣乾之井云龜鳴岐野鼃  
應山淵漢書張衡傳鼃鳴鼃應章懷注引易林龜鳴岐野  
鼃應于泉唐時古本如此黃刻宋本作驚鳴岐山龜應幽  
淵臆改無據不可從也頤之解云箕仁入室政衰弊極抱  
其彝器奔於他國黃刻宋本箕仁作飢人據史記西伯伐  
飢國滅之飢卽伐耆之耆晏案箕子與微子連舉故下用  
抱器奔國之事不必改作飢人以合於殷本紀也乾之咸  
云三人求橘反得大栗黃刻宋本作反得丹穴據史記巴



寡婦清事晏案復之大過云踰河求橘并得大栗可爲確證不必改作丹穴以合於貨殖傳也大畜之訟云哀相無極黃謂哀相當作衷相晏案毛本原文云靈公夏徵哀禍無極言其事可悲哀禍亂相尋無已於文自通不必改作衷相以合於左氏文也姤之晉云販鼠賣卜黃謂卜當作朴周人謂鼠未腊者爲朴晏案漢藝文志著龜家有鼠序卜黃於文爲順亦不必改爲賣朴以合於戰國策也畧舉一隅則黃本之失爲不少矣晏燁繹舊文用相讐校擇善而從無所偏主其有音義不明證之故書雅記疏其隱滯於所不知概從闕如仿陸氏經典釋文纂易林釋文二卷附著於後末學謏陋聊備遺忘尙冀有道君子斷而裁之譖其義焉咸豐四年歲在闕逢攝提格壯月山陽丁晏自

叙



山陽丁晏

晏儉卿著

乾之第一

蒙

鵠鵠鵠鵠專一無尤

宋本作鵠鵠是何本亦誤作

鵠毛詩傳鵠鵠枯鞠也爾雅釋鳥作鵠鵠郭注今之布

穀也

需

日瞞足動

各本同一本作日瞞誤蒙之如日日動

煩瞞說文瞞日動也如勻切西京雜記陸賈曰日瞞得

酒食太平御覽鑒戒引蔡邕廣連珠曰日瞞鳴近夫

小戒也

訟

龍馬上山

宋本作罷馬

小畜所行造德宋本無此一句

謙擔負差躓踈跌右足宋本擔作僭差作

跌踈曲禮連步以上鄭注重蹉跌也中孚之節云

豫

民安得從

毛本云從一作存宋本作存當從之

上源合韻

蠱

彭祖九子

大戴禮記陸終氏娶於鬼方氏產六子

其三曰箴是爲彭祖

噬嗑

不見白粒

翟云楚策黃雀因是以俯啄白粒作

甘者非

坎

黃鳥來葉

何本作來集當從之作葉字之誤宋本

作采菴翟本作采菴皆臆改不可從

咸

三人求橘反得大栗

宋本大栗作丹穴非復之大

過云踰河求橘反得大栗與此文同魏志東夷韓國出  
大栗如梨初學記引王逸賦曰燕薦朔濱之巨栗又引

辛氏三秦記武帝果園有大栗十五枚爲一斗漢書貨殖傳燕秦千樹栗蜀漢江陵千樹橘此其人皆與千戶侯等故下文以爲貴且富也 又女貴以富一本作女

青非何本不誤

遜 眇雞無距 何本作眇雞宋本作弱雞說文眇目傷眇也叱支切韓愈短燈檠詩兩目眇昏頭雪白下文云翹折目盲當從毛本作眇

大壯 卻大牆壞 宋本卻作隙同

蹇 騎狔逐羊 集韻二十三魂豚狔狔同後又作騎豚經涉虎廬亡羝失羔 宋本作虎穴羝作羊

井 龍鳴岐山鼈應山淵 後漢張衡應問龍鳴鼈應李

賢注引易林龍鳴岐野鼈應於泉唐人避諱多改淵爲泉也宋本作鸞鳴岐山龜應山淵非也御覽引淮南

萬畢術曰燒黿致鼃原注取黿夜燒之則鼃至

艮

民怯伐惡

宋本作城惡

毓崧案左氏成入晉侯使申公巫臣

道于莒與渠邱公立于池上曰城已惡宋本作也成九年傳云楚子重自陳伐莒圍渠邱渠邱潰奔莒莒城亦惡庚申莒潰楚遂入郢與易林寇賊大至入我邦郭之語正合入我

係獲宋本作郭係作俘

漸

水爲凶傷我寶

宋本凶作災寶作足

本作難生子

豐

藩屏固衛

宋本作周衛

節

龍角博顙

宋本作博預非

中孚

舜生大禹石夷之野

翟云路史後紀秦宓曰禹

生石紐山在西番界龍冢山之原長於西羌也

也雜書曰有人出石夷言石紐之夷也

并治

宋本作并治

坤之第二

比 飛上喬木 宋本無此一句 又鼓其羽翼宋本作

升高鼓翼

小畜 五範四軌 周禮大馭祭軌乃飲注故書軌爲範

杜子春云軌當爲範車軌前也說文車部範範較也從  
車範省聲讀與犯同唐韻正軌字注引五範四軌宋本  
作五軌非

履 敝筍在梁魴逸不禁漁父勞苦連室乾口 宋本無

此一行履下接四足五角句

同人 析薪在剋 宋本無此一句

大有 遷延惡人 宋本作奸延非 又炎火爲殃宋本

作災火

豫 鉛刀攻玉堅不可得 睽之歸妹云鉛刀攻玉无不

鑽鑿韓詩外傳鉛刀畜之而干將用之不亦難乎漢書  
賈誼傳鑢鋸爲鈍兮鉛刀爲銛後漢隗囂傳駑馬鉛刀  
不可強扶班超傳而無鉛刀一割之用乎 又盡我筋  
力胝蠶爲疾比之大過亦云胝繭爲疾與上得合韻宋  
本作爲候誤胝謂胼胝蠶卽繭字戰國策足重繭而不  
休息注足傷皮皺如蠶繭也損之晉云盡我筋力胼胝  
爲疾正與胝蠶同義何本胝作眠宋本蠶作蠶皆誤

隋

舉袂覆目

宋本作舉被非

觀

北辰紫宮

漢書李尋傳紫宮極樞通位帝紀孟康

曰紫宮天之北宮也極天之北極星也淮南子天文訓  
紫宮者太乙之居也

剝

南山大獬盜我媚妾

太平御覽獸部引博物志蜀

中南高山上有物似獬猴長七尺能行健步名曰猴獬



一名馬化或曰猥同行道婦人有好者輒盜之以去  
人不得知行者每經過其旁皆以其長繩相引然故不  
免此能別男女氣臭故取女不取男去而爲家室其無  
子者終身不得還十年之後形類之意亦惑迷不復思  
歸有子者輒送還其家產子皆如人有不食養者母輒  
死故無敢不養也及長與人不異皆以楊爲姓故今蜀  
中西界多謂楊姓者率皆猥馬化之子孫時時有猥  
爪者說文猥母猴也引爾雅猥父善顧攫持人也釋獸  
今作猥郭注猥猥也釋文猥字亦作猥俱縛反

无妄 昧爲目病 宋本作昧爲目疾

大畜 典冊法書藏在蘭臺 漢書百官公卿表御史大

夫一曰中丞在殿中蘭臺掌圖籍秘書後漢書班固傳  
除蘭臺令史遷爲郎典校秘書續漢書百官志蘭臺令



史六百石掌奏及印工文書文選宋玉風賦楚襄王遊於蘭臺之宮是古有蘭臺之名西漢因之

大過 癰癭禿疥常不屬遠 太平御覽癰引癰癰瘍疥

宋本遠作逮與上害合韻

離 齊魯爭言戰於龍門 漢書五行志春秋桓公十四

年御廩災董仲舒以爲先是四國共伐魯大破之於龍

門注引韋昭曰魯郭門公羊桓十年冬齊侯衛侯鄭伯

來戰於郎何休注龍門之戰不舉地也桓十三年公會

紀侯鄭伯及齊侯宋公衛侯燕人戰齊師宋師衛師燕

師敗績何注郎雖近猶尙可言其處今親戰龍門兵攻

城池尤危故恥之疏引春秋說曰龍門之戰民死傷者

滿溝也者主說此經故知之太平御覽人事部引春秋

攷異郵龍門之下血如江宋均注龍門戰在魯桓十三

年

咸 農人豐做 宋本作豐敵非

遜 鴟鴞破斧 一本作破府誤 又賴旦忠德旦謂周

公旦宋本旦作其非

大壯 乾溪驪山秦楚結冤 左氏昭六年傳楚令尹子

蕩帥師伐吳師于豫章而次于乾谿注乾谿在譙國城

父縣南楚東境溪谿同

晉 捌潔累累 玉篇手部捌呂結切捺也廣韻十七薛

捌埤蒼云揲也比之大有又作列潔累累宋本捌作捌

又嫫母銜嫁 史記五帝紀索隱嫫母黃帝第四妃

說文作蔓蔓母都醜也楚辭九章蔓母姣而自好无妄

之豫云東家中女蔓母最醜渙之蠱云嫫母畏畫

明夷 訾陬開門 井之鼎云訾陬開門左氏襄三十年